

## **GFFTL (Grupo Feto Foinsa'e Timor Lorosa'e)**

### **Vizaun Jerál kona-ba Organizasaun no Aprosimasaun kona-ba Jéneru**

GFFTL (Grupo Feto Foinsa'e Timor Lorosa'e) hahú iha 1998 hanesan organizasaun estudiantil atu fó apoiu ba movimentu independéncia nian. Nia hahú hola parte iha Konsellu Solidaridade Estudante Timor-Leste nian. GFFTL nia formasaun hetan inspirasaun husi grupu sira seluk ne'ebé envolve tiha ona ho masa sira atu asegura sira-nia partisipasaun iha luta ba independéncia, hanesan OPMT (Organização Popular da Mulher Timorese) no OPJT (Organização Popular da Juventude Timorese). GFFTL nia membru fundadór sira haree katak iha nesesidade atu harii organizasaun ida ne'ebé feto foinsa'e sira maka kaer hodi servisu ho feto sira iha área rural.

Liu tiha loron konsulta populár iha 30 Agostu 1999, GFFTL nia membru sira decide atu hala'o nafatin organizasaun ne'e. Liu-liu tanba GFFTL nia membru sira haree katak, maske hetan ona independéncia nasional, feto nia independéncia sei presiza nafatin luta ida ne'ebé naruk no kontínua.

GFFTL nia vizaun mak Timor-Leste ida independente, no rezulta mos feto nia liberdade. GFFTL nia esperansa maka, se organizasaun barak servisu hamutuk ho comunidade sira, iha tinan 50 oin mai feto bele hetan liberdade iha aspetu oin-oin. Nu'udar ezemplu, feto hotu-hotu sei bele hakerek no lee, iha asesu ba edukasaun ho qualidade ne'ebe diak no hetan saúde di'ak. Ba GFFTL, fator ne'ebe satan feto nia liberdade maka distansia ne'ebe haketak comunidade husi sidade Dili, ne'ebe hanesan sentru empregu, organizasaun barak desemina nia programa no sistema informasaun konsentra ba. Nune'e, oraganizasaun iha kometimentu atu luta nafatin ba progresu feto sira iha área rural.

GFFTL nia modelu kona-ba mudansa jéneru ninian fó énfaze ba feto no mane atu servisu hamutuk iha sira-nia moris loron-loron nian tuir dalan ne'ebé fó apoiu ba feto nia emansipasaun no responsabilidade ne'ebé hanesan ho mane sira. Ba GFFTL, importante maka comunidade lokal no família sira komprende no envolve iha prosesu atu muda knaar jéneru ninian, la'os tau tiha mane sira ba sorin no lida de'it ho feto sira. GFFTL hatene katak comunidade barak no mane sira sei kontra makaas atu halo mudansa ba jéneru nian. Baibain sira haree ba 'jéneru' hanesan revolta feto nian hasoru mane, hanesan rezultadu sira haree ida-ne'e hanesan situasaun ida ne'ebé lori comunidade no família ba fahe malu.

GFFTL fó motivasaun ba comunidade atu komprende oinsá maka ema uza ideolojia balu, hanesan ideolojia kulturál ka religiaun, ne'ebe atu ema hala'o relasaun ne'ebe loos no diskriminasaun hasoru feto. Ezemplu, iha nesesidade atu halo mudansa ba ideolojia bainhira ideolojia sira-ne'e prevene feto atu hetan oportunidade ba edukasaun hanesan ho mane sira.

GFFTL sai hanesan NGO independente ida iha fulan Outubru 2001. Nia eskritóriu prinsipál tuur iha Dili, maibé nia iha baze ida iha Baucau. Ida-ne'e fó oportunidade ba staf atu fasil hala'o servisu iha distritu Baucau, Viqueque no Lautém, área sira ne'ebé oras-ne'e GFFTL konsentra nia atividade ba. GFFTL iha staf permanente na'in hitu, ne'ebé na'in lima tau iha fatin espesífiku, ne'ebé sira halo vizita ba area implementasaun programa dala-rua fulan ida. GFFTL nia doadór agora ne'e maka APHEDA, International Women's Development Agency (IWDA), Embaixada Inglaterra no UNDP. Doadór sira seluk inklui Kyoto, Carter Center, National Democratic Institute, UNOTIL no UNIFEM. GFFTL sei dauk sente katak nia

asegura ona fonte finansiamentu sira, tanba baibain programa sira hetan finansiamentu husi organizasaun sira ba tinan ida-ida ka ba tempu badak nia laran.

## **Programa**

Bainhira harii tiha iha 1998, GFFTL hala'o konferénsia ba dala uluk kona-ba feto Timor-Leste ho Tema Konferénsia kona-ba Feto Timor-Leste nia Imajen, ne'ebe'e hetan suporta mos husi organizasaun seluk atu bele realiza konferénsia ida ne'e. GFFTL nia atividade boot liu molok konsulta populár maka atu fó edukasaun ba feto sira iha área rural kona-ba prosesu konsulta populár ninian. Ida-ne'e halo atu fó motivasaun ba feto nia partisipasaun iha prosesu votasaun no atu asegura katak sira hatene loloos sira-nia opsau: ukun rasik an ka autonomia espesiál iha Estadu Indonesia.

GFFTL nia atividade primária ne'ebé hahú iha tinan 2000 maka programa alfabetizasaun no numerasaun ba feto sira iha área rural, treinu sosiál iha área jéneru , direitos umanus, demokrasia no violénsia doméstika. GFFTL buka atu identifika fatin sira ne'ebé maka hetan karik benefísiu husi nia programa sira. Hafoin, staf sira hakbesik an ba *xefi suco* ka *xefi aldeia*, juventude no organizasaun lokál sira-nia ulun boot sira hodi esplika sira-nia programa atu hetan koenesementu. Maske prosesu ida-ne'e baibain ba diretamente ba programa alfabetizasaun ninian, fofoun GFFTL hetan rezisténsia makaas husi líder comunidade sira kona-ba programa treinu sosiál tan importánsia ne'ebé nia fó liu ba jéneru. Maibé GFFTL uza forma oin-oin atu bele hetan apoiu no konsentimentu, esplika liu-liu katak sira la'os atu hamoris konfliktu maibé atu ajuda comunidade atu hetan dalan ida di'ak hodi fahe sira-nia servisu.

### *Programa Alfabetizasaun no Numerasaun ba Feto*

GFFTL decide ona programa alfabetizasaun no numerasaun sai hanesan nia programa prioridade, tanba razaun lubun ida. GFFTL analiza katak sistema kolonializmu no patriarkal halo limitasaun maka'as ba feto sira atu hetan oportunidade edukasaun nian, liu-liu ba feto kiak sira ne'ebé moris iha ambiente agrikultura subsisténsia nian, ne'ebe rezulta feto barak mak lahatene hakerek no lee. Ida-ne'e nia impaktu la limita de'it ba área edukasaun ninian. GFFTL haree ba edukasaun hanesan nesesáriu ba partisipasaun iha demokrasia ida ne'ebe ho significadu. Alfabetizasaun no numerasaun konsidera hanesan pre-kondisaun bázika ba feto atu bele komprende no utiliza sira-nia direitu demokrátiku no umanu, no mós atu hetan asesu ba informasaun ne'ebé la'o iha nasaun laran.

GFFTL haree mós katak inan sira maka fatór xave ba oan sira edukasaun nia susesu. Se inan ida, komprende prosesu edukasaun nian no nia benefísiu sira, inan ne'e bele mehi futuru ida oin seluk no di'ak liu ba nia oan sira, iha liu possibilidade atu fó motivasaun no apoiu ba nia oan sira-nia edukasaun. Inan ne'ebé maka iha koñesimentu báziku kona-ba hakerek no lee bele mós iha abilidade atu akompaña no halo monitorizasaun nia oan sira-nia estudu, ida-ne'e sei hadi'ak oan no inan nia dezentvolvimentu.

Rezultadu di'ak liu ba programa ida-ne'e mak, partisipante sira hatene lee no hakerek letra, hatene sura númeru 1 to'o 100, atu sura nato'on atu bele hala'o uma-kain ida nia moris no atu iha estratéjia hodi fó apoiu ba sira-nia oan nia edukasaun.

Hahú husi 2000 maka GFFTL hala'o nia programa alfabetizasaun no numerasaun iha *suco* liu 50 iha distritu sanulu (Ermera, Dili, Aileu, Manatuto, Liquiça, Lautém, Ainaro, Bobonaro,

Manufahi no Baucau). Baibain programa ne'e bele hala'o ba pelumenus fulan neen iha fatin ida-idak no klase ida hetan besik partisipante na'in 15. Oras-ne'e programa ne'e konsentra iha area lima iha distritu Baucau, Viqueque no Lautém, ne'ebé fatin idaidak harii ona sentru alfabetizasaun no numerasaun. Sentru rua maka funsiona diak durante fulan neen nia laran, sentru tolu maka simu apoiu husi GFFTL iha liu fulan 18 nia laran. GFFTL sei servisu nafatin ho sentru sira-ne'e, GFFTL nia staf sira halo servisu ho comunidade sira durante loron neen kada fulan ida. Sira nia atividade prinsipál maka atu fó apoiu no dezenvolve grupu no fasilidadór lokál sira-nia abilidade. Iha sentru sira ne'ebé GFFTL hala'o nia programa iha fulan 18 nia laran, besik 1/3 partisipante maka bele lee ona material sira hanesan série revista *Lafaek Ki'ik*.

### *Programa Treinu Sosiál*

GFFTL hala'o nia programa treinu sosiál kona-ba jéneru, direitus umanus, demokrasia no violénsia doméstika ho fetu no mane sira iha fatin oin-oin iha distritu 13 Timor-Leste nian. Kada treinamentu partisipante hamutuk ema nain 25. Workshop sira-ne'e hala'o iha loron tolu nia laran, ne'ebé GFFTL uza téknika fasilitasaun oin-oin, inklui mós drama. Bainhira halo servisu kona-ba tópiku sira, hanesan jéneru no violénsia doméstika, GFFTL fó motivasaun ba la'en no feen atu atende treinu hamutuk atu nune'e bele hasai tiha konfliktu ruma maka iha karik iha uma no atu promove servisu hamutuk hodi bele hetan mudansa sosiál. Nu'udar ezemplu, GFFTL hatene katak se fetu de'it maka atende treinu, mane sira bele duvida ona-ba programa ne'e no akuza sira-nia feen katak bosok atu seesan husi sira-nia responsabilidade hanesan te'in.

Treinu sosiál representa área prioridade ida ba GFFTL, tanba organizasaun ne'e sente katak comunidade barak ne'ebé dook husi Dili ladun asesu ba informasaun klaru no ba prosesu sosializasaun kona-ba matéria espesífiku sira iha área ida-idak. Hanesan rezultadu, realizasaun nasaun demokrátika ida ninian sai limitadu, ne'ebé comunidade sira sente hanesan sira la halo parte iha instituisaun sira governu ninian no prosesu sósiu-polítiku ne'ebé mai husi klaran. La asesu ba informasaun no ba programa sira iha kapital kria mós konfuzaun barak no inkomprensaun kona-ba matéria sira hanesan jéneru no demokrasia iha comunidade sira-nia laran. GFFTL hatene katak maske bainhira atu hahú bele iha rezisténsia balu atu aprende kona-ba jéneru, liu-liu husi mane sira, comunidade barak maka iha vontade boot tebes atu hetan klarifikasaun no informasaun kona-ba material sira iha área sira-ne'e, no husu pergunta atu hatene relasaun entre direitus, lei no mekanizmu justisa ninian.

### **Kontaktu**

Tel: (670) 726 1671 (Executive Director Rosa Xavier)  
Email: rosa\_xavier@hotmail.com; naro\_xavier2000@yahoo.com  
Address: Knua Buka Hatene Centre, Estrada Comoro, Dili

*Husi: Trembath, Anna no Damian Grenfell, Mapa ba Lala'ok Buka Igualdade Jéneru: Atividade Ajénsia La Governamentál no Internasionál nian iha Timor-Leste, Globalism Institute, RMIT University, Dili, July 2007, ISBN 978-0-646-47770-1, pp. 42-44.*